

頤道堂詩外集

頤道堂詩外集卷八

錢塘翁陳文述

古今體詩 卷三

題薛濤集

峨眉秀色錦江春
萬里橋邊日暮雲
唱到琴心新製曲
才名不數卓文君

節度威名賦蜀都
玉簫前世定何如
多情誰似韋中令
乞

奏頭銜女校書

韋舉議以校書郎奏請護軍不可

花葉題詩望若仙
夢中彩筆倩誰傳
百花潭水明于玉
染出深紅十樣牋

玉人家近碧雞坊
遲暮幽蘭亦自芳
解爲秋娘書墓誌
憐

才只有段文昌

神女爲雲或有之孤墳花落小桃枝唐人小說荒唐甚又
續田郎夢裏詩

雕璫鏤玉寫芳華珍重雲間處士家閒向鏡秋亭上讀枇

杷如雪正開花

集爲雲間沈氏重刊適過余香雪校書家坐鏡秋水樹讀之

楚天暮雨暗春旗吳苑花憐第一枝咫尺閭門天樣遠肯

教輕賦十離詩

戲贈香雪

初鶯早燕膩芳春一曲新聲動暗塵畫舫羣芳都似玉吟

詩樓上定何人

詩樓有吟

題羅兩峰補畫西湖社集圖

明何雪漁爲馬湘蘭鐫浮生半日閒小印旁題識

云王子穀日同藍田叔董元宰崔長羽梁千秋社
集西湖舟中女士馬湘蘭索刊云云此印爲彭愛
園所^藏羅兩峯爲之補圖乾隆辛亥王秋塋沈又
村陳理堂錢季重吳嘯鶴銷寒雅集曾賦此題今
圖歸楊蓉裳農部農部作長歌紀之余系以十絕
句

落葉寒蕪舊院街芳名何處問秦淮荒園日暮停飛絮一
曲清溪弔玉釵

東風吹上木蘭舟春到蘇家樹外樓一個佳人五名士劇
憐此會亦千秋

小字親鐫玉篆斜何郎鐵筆舊名家紅泥尙帶胭脂暈押

徧同心幾幅花

畫中人與鏡中山難得浮生半日閑翠袖練裘都化蝶但
畱片石在人間

梵字雕檀好護持香黏粉浣撫蟠螭梁園賓客眞風雅對
雪頻題七字詩

羅含畫筆蕭閒甚重補西湖社集圖未展冰紈先一笑不
知曾寫玉鈎無

江南詞客楊農部第一多情絕世才題到詩魂零落句笛
聲隣巷不勝衣

細雨窗前短燭燒披圖重爲話前朝漫云酒是消愁物似
此閒愁恐未消

憶娘小影眉生印海內珍藏二百春此集此圖應倍惜紅
粧季布復何人

我憶段家橋半路青山常對美人看鳳雛已嫁芳蘭瘦紅
豆銷魂餞暮寒

眉樓曲

湘簾亞碧文牕綠紅樓斜抱青溪曲溪頭春水碧粼粼照
見曉粧人似玉玉人嬌小不禁秋南部烟花第一流牕外
春山青入畫題名眞合署眉樓東南曉日樓前出畫幔低
垂玉奩密浣花百幅薛濤牋斑管一牀道昇筆玉臺無事
對芳蘭夢入瀟湘小影寒話到同心知有幾葦芽惆悵寫
輕紈菊蘂藕鮓雕盤薦顧家食品人尤美掃眉才子賦閒

情樓中長日開文讌尙書江左擅才名月病花愁最有情
團扇影中迴一顧玉簫聲裏話三生三生慧業姻緣重蘭
因絮果何年種吹放東風第一枝白門柳色春如夢同心
寶結合歡杯珊枕聯吟賦玉釵卻月橫雲新樣好香螺親
試畫眉才相逢底事還相別江南芳草燕臺雪南鴻遠道
寄相思鴛鴦小字繡雙纈鳳城璧月十分圓轉眼秋星又
一年綠鬢重教看酒畔畫裊親爲解燈前檀雲萬里青天
落畢竟團圓踐佳約話到更番苦憶情渡河早鴈填橋鵲
烏程秉軸臥病狼國步艱難未可量列狀何人思報國紛
紛豸繡立袖子女兒獨抱英雄識慷慨相期盡臣節諫草
頻催削牘成玉蟾滴露親磨墨夜色甘拚瘦影孤淒涼詔

獄泣啼烏畫羅宮燭雙花燼尙對孤臣諫徽書九閣恩重
邀輕恕江湖浩蕩容歸去蔣山烟雨秣陵秋曾是當年舊
遊處重泛秦江水生上舟月明同過板橋頭盛名當日喧桃
葉狎客猶譚舊畫樓重來彷彿盧家燕曲中姊妹邀相見
市隱園中話舊情中林堂上開華讌壽人樂府曲中傳其
憶前朝丁酉年紫蓋花幢供繡佛珠鐙春酒讌羣仙小部
梨園識誰某西望瑤池降王母登場中翰乞纏頭長跪監
司將進酒十曲燈屏絕妙詞絳雲高閣寫烏絲一彎眉月
初三夜香雪橫陳十萬枝春來同放西湖艇鏡中自愛娉
婷影雨餘紅餞落花寒月中白弔閒鷗冷招提禮徧妙蓮
花小住湖樓倚暮霞自酌清泉酌蘇小前身玉貌憶天斜

寓公慙作湖山主奉常甘受人妖侮裏繡頻將嬌女嬉雕
檀心羨香嬰乳重入春明百事驚弓刀滿地黑山兵扶攜
夫婦兵間活不分黃蘗有再生王師定鼎驅流寇尙書
富貴仍依舊勸忠空寄虎頭書但是貴人都有壽男裝結
束更無羣翠帽烏裘玉立身合璧龍鸞清漢字丹書一品
救夫人藥裏纏綿悲不起從古佳人宜早死閨房遭際似
君稀禎福艷名都備矣尙書伉儷最情深白髮黃門感不
禁高義有人憐故劔悼亡無地覓遺簪國初諸老工銘
誄不數南朝助莊美迎陵太史更多才玉魚金碗詞尤綺
蕭寺荒寒寄玉棺高僧禮懺說中元慧光不化幽燐去定
向瑤臺跨采鸞雕櫺零落悲蛛網妙光閣已無人上水仙

羅襪畫蘭裛絕代風姿空想像翠袖朱家許共論流傳遺
蹟亦銷魂細桃畫幅臙脂印海內何人什襲存粧臺春曉
芙蓉面蔣家山寶梅花硯曾賦紅絲絕妙詞簪花寫韻心
尤戀舊院啼烏夜有霜當時金粉半銷亡他年重過迷樓
畔應爲徐孃弔夕陽

顧橫波梅花硯爲蔣青荃題

春雨簾櫳玉押垂烏絲細膩賦紅絲美人心跡如冰雪一
瓣花題一首詩

璧月飛瓊夢未闌鏡中國色泥朝寒曉粧小注金壺墨半
寫修蛾半畫蘭

合歡新樣製香螺圓暈應教侍女磨曾見桃花紅一幅親

題小字署橫波

一雙斑管鏤紅牙飛絮微吟說謝家何處新詩題最偏
湖烟雨聖湖花

額點含章短夢春愛花真合署花神一庭香雪濛濛月憶
爾粧臺寫韻人

疎影寒香暈墨痕春雲同膩玉同溫桃花顏色梅花骨硯
背摩挲日幾番

六朝金粉此仙才翠靨綃衣麗鏡臺羨爾一雙鸚鵡眼當
年飽看玉人來

名印流傳跡未孤祇空架筆伴珊瑚江南大好收藏地我
憶青溪識小姑

題寇白門小像用梅村韻

六朝花送一枝簫回首金燈甲士驕今日輕烟樓畔路更
無楊柳鬬纖腰

珍重千金與萬金嬋娟報主意何深芳名不入奚官籍扇
底桃花識此心

生降南北幾朝官始識將軍一死難花外暮雲濃似墨亂
鴉啼煞小長干

不學燕姬墮馬粧歸來仍住善和坊尊前大有滄桑感紅
粉沾衣淚兩行

秦淮明月夜遲遲仍按雙鬟譜十眉病裏無人情遲暮心
腸木石是吳兒

紅粉叢殘落葉飛
邗江有客采真歸
薜蘿小塚埋香地
我亦琴河弔舞衣

錦樹林訪玉京道人墓

九龍山下傷心路
當風錦樹紛無數
春草紅心怨落花
云是佳人埋玉處
埋玉佳人字玉京
秦淮舊院早知名
門前一片清溪水
照見嬋娟最有情
嬋娟從古空佳耦
多少娥媿好姿首
市隱園中學畫眉
絳雲樓上同攜手
延陵季子出羣才
曾向當筵一顧來
應是紅絲慳夙慧
羅浮風雨竟吹開
白門楊柳花如雪
紅粉青衫相決絕
讀到琴河感舊詩
多情薄倖何從說
更惜蛾眉命不辰
南都又見叔灰新
黃紕入道囊琴去
怕說宮中第一人
玉顏小妹終何似
侍

兒也爲將軍死剩有空山出世人一坏零落祇園址祇園
當日屬雲林清閼風流不可尋一片芙蓉湖水濶美人名
士總銷沈

薛素素挾彈圖

鳳釵壓髻花圍領單衫結束纖腰整省識前朝薛潤娘生
納誰寫娉婷影構李城邊路狹斜傾脂河畔美人家枇杷
晝靜銅鑲掩春水鴛鴦泛落花十能竝擅真無敵吹竹彈
絲竝奇絕就中挾彈技尤精僚丸羿射無顏色翠袖微揜
雪腕擎柘弓如月彈如星斜飛春雨明珠影碎裂秋冰斷
竹聲玉鞭繡鐙青絲轡五陵俠客容聯騎走馬歸來酒半
酣每將小婢鴉黃試玉帳牙旗上將壇貂蟬恩寵李征蠻

特從別院開金屋最愛專房對玉顏桃花顏色芙蓉面畫
圖海內流傳徧南方宜慰西陽彭揮盡千金慳一見東風
花謝海棠紅非雨非雲舊夢空羊氏舞人畱靜婉石家房
老說翹風凡心懺盡皈依佛半偈蓮花夢水月小字金函
一卷經猶是尙書少年筆鉞神繡綫校書牋瓊樹風流望
若仙少日艷情憐我晚生平絕技問誰傳黃華小巷春如
掃南朝金粉於今少畫眉斑管況工詩烏絲曾寫南游草
我願黃金鑄彈丸眼前羅綺似君難燒鐙爲續江都句題
傍雲鬟著意看

題李香小影

非序

丙寅冬日梅菴宮保勘河雲梯關於安東行館壁

閒得明李香小影寫在聚頭扇面上長身玉立著
澹紅衣碧襦白練裙圖中梅樹二映以奇壘凭梅
佇立思字間有英氣恨色後署辛卯四月爲香君
寫照款曰洛生印曰馬振左方題一詩云淡淡春
山淡淡粧生來氣節異尋常卻歛不肯歸奸黨干
古東隣姓氏香辛卯夏六月綠川漫題一圓印曰
毛偉按辛卯距甲申八年距今年丁卯則百五十
七年也白馬青絲空譚往事春燈燕子誰管興亡
而桃花扇樂府至今艷稱於酒旗歌板間因備錄
之以補余澹心孔東塘兩家之缺

寒潮夜上秦淮曲舊院春殘苔印綠閒得桃花扇底春晝

裏依然人似玉玉人玉立艷無雙小影分明認李香迴首
十三好年紀彎環眉黛學鴉黃梁園詞客騷壇起才名第
一侯公子荳蔻花前早日成琅邪祇合爲情死一握宮紈
賦定情果然名士悅傾城祇應丁字簾前水花月江南過
一生小玉風姿最明靚佳俠含光氣尤勁居然氣節勝東
林慷慨拒簪還卻聘燕子樓高志不移可憐巾幘勝須臾
如何壯悔堂中集佳傳仍多約畧詞吁嗟乎南渡衣冠眞
草草水天閒話嬋娟好殘紅冷翠弔滄桑橫波人遠靡蕪
老云亭樂府點冰綃雜記應增舊板橋金粉千秋銷北里
烟花三月話南朝瘦影顰眉態妍冶沉憂也向毫端寫馬
遠丹青最擅長毛萇訓詁尤都雅拋殘絹素未成塵零落

人間二百春惆悵玉梅扶倩影年年花落賦招魂

題沙嫩吹簫小影

銷魂金粉怨用朝舊院風流記板橋畫裏依然好明月美人
和影坐吹簫

流傳一卷蜨香詞愁煞清狂杜牧之更與秦淮添本事金
家畫筆阮亭詩

白石清詞最有名茶烟禪榻伴深更嬋娟身後偏多幸香
影盒中供一生

圖爲琴南所藏香影盒琴南齋名也

一縷仙丸尙有香秦淮流水易滄桑白門小影今何在

我識錢塘李十郎

寇白門影在李白樓處

題張憶孃簪花圖

一曲瀟瀟水閣涼
禁鐘春雨夢初長
生平祇愛吳粧好
斷粉殘縑賦憶孌

娟素流傳浣綠苔
明珠合浦幾時回
今知玉匣蘭亭貴
能贖蛾眉小影來

翦燭親題七字詩
才名當日笑袁絲
茶烟禪榻銷塵夢
不恨遲生杜牧之

繡谷園荒舞榭傾
彩雲銷盡劫灰平
春魂已化紅心草
應傍眞孌墓上生

月夜聽文文香度曲

雙影春燈照畫筵
朝霞和雪十分妍
花飛玉屑香唇綻
紅暈脂痕笑靨圓
艷到雲容明似月
吹來蘭氣澹成烟
尊前

領取銷魂意多少閒愁到酒邊

從來國色有光輝盛鬢豐容似爾稀明鏡自憐梳子艷羣
芳都讓牡丹肥重簾不卷春雲駐四壁無聲白雪飛一曲
遊仙歌未竟萬花吹滿五銖衣

果然史鳳最娉婷鷄枕蓮燈許蹙經檀板一雙敲紫玉盡
樓三五指明星柔情似水和愁訴軟語如花倚醉聽我比
馮生更僥倖流蘇拂面臥春屏

白月窺人照綺櫳滿庭春霧澹空濛心香灰冷銷金鴨畫
燭花寒炮玉蟲跌宕可能同素素聰明真不讓紅紅曲終
便掛孤帆去臨別題詩記雪鴻

遲來

遲來應誨鵲鵲程惆悵樊川誤舊盟此地竟成迴馬嶺君
家原有閉門羹題襟墨澹春屏暗記曲人遙繡檻橫最憶
歌殘花十八匆匆一夢抵三生

湖船雅集

媚姪意態不凡才油壁車看柳外來扶上畫船迴一盼滿
湖雲影盡徘徊

當筵唱煞鬱金裙風約衣香四座分怪道昨宵微雨過雙
峯畱得美人雲

酒痕容易上雲衣鷄枕春屏舊夢非一曲流珠歌小海四
山紅葉作花飛

螺丸細膩寫蛾眉空谷幽芳未許知秋水自憐堪照影芙

蓉花下說相思

坐對青山倚畫橈
流波不定聽吹簫
生來愛識團圓字
怕說迴船過斷橋

斜陽無賴送歸鴉
酒後殘粧艷晚霞
絮語丁寧邀過訪
百花池巷是兒家

後湖船雅集

畱照蛾眉月一痕
獨教鸚鵡語黃昏
兒家住處宵纔識
不隔清溪恰對門

峭寒輕襲鷓鴣裘
玳瑁重簾掩畫樓
親叩銅環催早起
芙蓉花下看梳頭

鳳眸一顧最魂銷
三疊霓裳急暮潮
愁煞梧桐搖不定
秦

臺明月願吹簫

縠紋照影水生香
白紵紅牙樂未央
一抹青山漸催暮
人間無賴是斜陽

箏鬟瑤君

迴影彈垂髻
明鬟壓翠翹
一雙國工手
十五女兒腰
雁起銅絃急
蟲低絳蠅銷
聊因遣惆悵
其柰轉無聊

女郎語鳳讀余題壁詩朗然成詠書此贈之

驛壁淋漓七字詩
禁城春夢雨絲絲
剪燈夜聽雙鬟唱
爭似黃河遠上詞

訪杜宛蘭不值

城南親訪杜秋家
微雨空庭有落花
荳蔻香消粉斂水
櫻

桃紅瘦畫櫺紗樓頭小影流黃幕天際真人萼綠華珍重
鸚哥解畱客重來還擬問琵琶

絲絲烟柳綰餘寒不盡斜陽戀曲闌未許閒情畱玉佩
題小字付冰紈虛傳月地三生近始覺雲容一見難遲叩
春屏吾薄倖催人帆影在河干

擬訪史文香以解帆不果

贈宛蘭

前身原是杜蘭香小謫紅塵翠袖涼秋舫一簾迷翡翠春
屏四壁護鴛鴦青琴心事傳孤韻錦瑟年華付澹粧祇有
盧家新燕子雙棲得近鬱金堂

曾叩琵琶白版門疎簾不捲亦銷魂渡江桃葉遲歸棹滿
地苔花長唾痕昨夜雨聲仍碧落舊時月色又黃昏雲容

暫許今朝見小坐餘香一晌溫

影事傳來一倍愁
拏帷不出定佯羞
本無金屋藏嬌鳳
依舊銀河讓女牛
北里餞春潭水路
西洲尋夢硯花樓
青溪願作行三妹
我是南朝舊蔣侯

別緣太早會緣遲
惆悵河橋日暮時
璧月瓊樓曾入夢
水花雲葉總相思
重來門巷迷崔護
此後江湖怨牧之
愁絕孤帆臨發夜
春陰黯黯雨絲絲

題宛蘭簪花圖

楊子鶴畫張憶娘簪花圖舊藏繡谷蔣氏吳門周雲巖爲宛蘭寫照仿其格爲後簪花圖

一種幽芳宛是蘭

汪誦茗句

流蘇低亞護春寒
昨宵纔識驚鴻

影更展生綃仔細看

踏徧長安道上塵金臺芳草感閒身十年落拓青衫舊羞
見簪花第一人

烏鵲橋成渡女牛絳河清淺不知秋空山種得同心草從
此簪花總並頭

載酒江湖未有期無端愁緒細於絲迷離花影迷離夢更
賦紅樓本事詩

一樣蛾眉一樣粧畫圖珍重付王昌春深繡谷花如海曾
向蘇州賦憶娘

余舊有題張憶娘簪花圖詩

垂鬟十八妙鬢梳天上雲璈事有無我識雙成最嬌小何
人爲寫攬環圖

謂雙婷

過宛蘭舊宅贈小蘭

蕭蕭落葉送黃昏，尙記吳娘別院門。
重倚畫闌牽桂葉，相逢小妹字桃根。
簾櫳涼月新詩境，潭水微波舊夢痕。
第一琵琶天樣遠，網絲塵跡總銷魂。

雨中同林篠谿訪杜小蘭不值題壁並畱示素芬校書

微雨絲絲濕落花，城南重訪杜秋家。
空餘翠黛拋脂盞，何處香泥帶鈿車。
羅幔玉鉤妨去燕，畫樓芳樹歇啼鴉。
紅闌干外相思地，綠到蘼蕪漸有芽。

交支屈戌鎖瓏玲，不隔疏簾隔畫屏。
箏柱拂塵金雁澀，笙囊挂壁玉鸞停。
暫因此地焚香坐，恰憶前宵刻燭聽。
淺醉

漸消殘夢斷舊遊歷歷記冥冥

果然月姊好風姿也是湘雲第一枝桃葉烟波同渺渺杏花消息故遲遲鏡斂燈疊曾雙照鬢影衣香更幾時鸚鵡前頭話惆悵閒愁應有侍兒知

門前綠樹倚蘭橈新漲初平四百橋臨水將歸空目斷所思不見倍魂銷人憐吳苑三春絮夢落揚州一夜潮欲去未成畱未得暮雲簾外響瀟瀟

再贈小蘭

盧家燕子鬱金堂翠袖題詩夢未忘花月樓臺仍杜曲神仙眷屬又蘭香迴身乍覺雲衣薄顧影應憐錦瑟長一片春波潭水路美人香草總芬芳

娟娟翠黛畫初勻，恰稱芳華二月春。
柳絮前身楊妹子，桃花小影息夫人。
纖纖指甲偏宜瘦，楚楚眉痕不碍顰。
合屏風乞周昉寫真，重與喚真真。

飛花曲彖掩重重，春在微波水榭中。
雙槳桂蘭新翫舫，半塘金粉舊簾櫳。
爲持觴政長浮白，未許狂奴賦比紅。
理徧羅裙千峽，螭憐他身是可憐蟲。

桃根小妹態嬋嫣，青鳥啼香憶往年。
秋士酒悲容跌宕，春人花夢致纏綿。
柳絲門巷風吹雪，桂葉闌干月墮烟。
迴首舊遊臨別處，江南芳草又連天。

花朝同篠溪過杜氏雲波榭卽送歸揚州

樓頭芳樹靜棲鴉，來看長洲苑裏花。
春月簾櫳新水榭，夜

燈箏遂舊人家酒邊錄別歌三疊塵外遊仙夢九華祇有
離聲聽不得國工如玉理琵琶

胥江城郭雨初消綠暗旗亭四百橋二月春人輕酒敵百
年流水惜花朝曾無芳草迴征騎已有垂楊繫畫橈正是
江南好時節曉風殘月總魂銷

水潭感舊

香草多情日以蘭美人消息隔雲端偶經潭水迢迢路重
傷秋陰曲曲欄曾綰柳絲痕尙短舊題花葉墨初殘不堪
聽雨畱香地祇作華胥一夢看

略通芳訊亦前因往事從頭說宛君畫舫錄中書豔雪簪
花圖裏識朝雲仙音法曲知無比佳俠含光最出羣妬煞

阿連多豔福水天花月憶新聞

素生風調最翩翩慧卽文人俠卽仙
鄭旦夷光俱佚麗金童玉女好姻緣
牽蘿夢斷春殘夜倚竹秋寒日暮天
昨向五湖舟畔見玉顏憔悴總堪憐

詠齋樓外暮雲遮深鎖雕闌第一花
紫玉本爲吳苑女綠珠宐在石崇家
桃根小妹尤穠豔團扇芳姿最麗華
欲奪鸞篋須絕頂眼波如月照停車

研花樓感舊詩

出色花枝絕世無蘭香小妹豔紅芙
風流誰似交州長十斛明珠買綠珠

琵琶聲斷可憐春又見香泥送畫輪
從此桃花潭水路月

斜樓角更無人

芳姿別樣婉凌華雙帶泥金綰碧紗
昨向水精簾下見天寒翠袖說梅花

我亦當初折一枝風懷棖觸鬢絲絲
春燈又照紅樓雪愁絕城南本事詩

雨中飲杜又蘭宅

碧梧樓閣影參差小榭新涼遂一枝
紅豆歌中人似玉白蓮花外雨如絲
十年賭酒彈碁地幾度焚香坐月時
燕子鶯兒各新嫁畫屏墨澹舊題詩

芳草多情目以蘭一枝又見畫闌干
嬌如新月眞宜拜瘦到秋花轉耐看

蓉裳句

涼夢參差思倚玉秋心飄忽欲飛鸞

一帆別爾煙江去暮雨瀟瀟作意寒

題懷素芬憐影圖

掠罷明蟬翠袖迴落花飛絮其徘徊幾生修到清溪水曾
照驚鴻小影來

一生江鏡月嬋娟愁卽離騷悟卽禪除卻春波堪照影美
人從不受人憐

枇杷花裏閉門居花外紅闌碧一渠莫訝遊鱗盡驚避玉
顏原是號沉魚

湘草湘花識後身含光佳俠出風塵桃花潭水桐橋路憶
爾凌波解佩人

再題憐影圖

眼波如月照題襟
短句曾勞繡口吟
妬煞繁華山下客
丹青換得美人心

銅鋪女伴三春燕
一分飛玳瑁梁
解向吳門嫁張碩
神仙是杜蘭香

畫屏悔不喚眞眞
如此明眸少替人
家在鴛鴦湖上住
祇應蘇小是鄉親

微波小影亦珊珊
雙鬢鴉雛貌素紈
一自劉楨平視後
玉顏只許畫中看

畫扇姻緣艷玉臺
更攜翠袖出天台
問君何福能消受
雙戟西施鄭旦來

白玉雕闌更幾枝
桃花潭水影相思
雙鬟女弟如春月
重

諧城南本事詩

素春閣小集贈余香雪

也是吳宮第一枝
修蛾曼睩總相宜
畫屏曲到銷魂處
四面春蘭四壁詩

依約春痕入夢賒
美人小影玉梅花
若將花與羣仙例
便是瑤宮夢綠華

烟柳絲絲綰畫樓
小庭花落夜如秋
門前一片橫波綠
半是相思半是愁

鸚鵡空廊月滿軒
相逢不語亦溫存
簪花顛顛傳觴急
愁絕高樓酒一尊

素春閣壁間見家曼舊題一絕語境清妙微嗔不置

輒爲和之卽以寄曼

鴛鴦香夢遠迢迢十五吳姬蕩畫橈人在揚州明月裏蓬
聲吹過小紅橋

附錄

陳鴻壽

春江烟水碧迢迢十里東風蕩畫橈何處玉簫人不見
月痕吹上赤闌橋

十四夜同人素春閣餞別以今宵酒醒何處楊柳岸
曉風殘月分韻得今字

春蘭隱四壁幽香韻瑤琴中意何如別緒淒以深七發
枚乘意四愁張衡心未奮北海翼空慕西天禽昨宵扶醉
地舊夢不可尋墨痕淡如酒剪燭催題襟美人送將別殘

月行花陰門前紅豆樹相思芽自今

香雪乞詩復贈二絕句

雲藍幅幅澆燕支畫燭春紅照影遲
記取餞春明月夜美人磨墨乞題詩

儘拋半臂忍春寒欲去還畱坐夜殘
如此江南好花月教人消受別離難

鏡秋水榭雅集詩

香雪移居小園有水華林石之勝
八月七日招集鏡秋水榭卽事

桃葉桃根笑渡江花光朱碧隔文牕
鏡秋水明於鏡照見凌波玉一雙

畢竟吳宮第一枝
畫眉春影鏡臺知
酒邊記得畱題處
四面春蘭四壁詩

桐花么鳳最輕盈
豆蔻芳年太瘦生
解唱玲瓏新樂府
水窗風簾送秋聲

竝頭花下宿鴛鴦
水荇牽風翠帶長
一尺微波秋欲語
紅闌干外卽瀟湘

百花潭水水浮花
花裏重門掩枇杷
最是多情高節度
月中親訪薛濤家

老曼風情似老蓮
燕支潑酒寫雲烟
當筵我亦踈狂甚
自翦秋燈賦一篇

博士詩名壓建安
廿年湖海說騷壇
謝家才筆今無匹
應

翦冰紈乞畫蘭

香雪乞蘭雪
姬人畫蘭

六朝金粉麗情多
丁字簾前倚棹歌
十四紅樓花月夜
遠

山眉黛更如何

企山至
自金陵

吳娘水閣好簾櫳
領取微波坐晚風
聽雨商量添種樹
紅蕉翠竹碧梧桐

迴廊斜轉畫屏橫
落葉狂花各有情
解作城南小園賦
才人誰是庾蘭成

蛾眉都是不凡才
畫舫題襟有別裁
壓倒吳宮花萬樹
月明雙鳳下秦臺

高秋良會易魂銷
惆悵吳城四百橋
今夕相逢須盡醉
碧天如水夜吹簫

七夕山塘水榭贈女郎張小蓉

山塘初落葉，水榭正微波。
鈿笛催華月，明燈掩畫羅。
伴羞障紈扇，斂笑指銀河。
牛女經宵別，相思定若何。

寄題蔣芷香秋蘭小影

修到名花便合愁，玉臺寒倚晚粧樓。
祇因怕被春風誤，自寫芳心託素秋。

空谷孤芳賸一枝，天寒翠袖坐題詩。
定知人亦如花瘦，冷雨幽窗病起時。

涼波不定玉人簫，魚鮎花寒譚翠翹。
曾憶小姑祠畔過，青溪烟雨夢南朝。

賞音真覺素心難，奩鏡香消璧月殘。
一自烏絲成訣絕，紅

鸚夜怨紫釵寒

一翦靈苗九畹分折枝香暗畫羅裙相思何必曾相識讀
到離騷便憶君

學寫幽姿護碧紗每因遲暮惜芳華幽蘭自是同心草獨
倚秋屏賞晚花

黃月濛濛曉暈涼美人秋夢落瀟湘託根好傍三生石一
桁春簾護國香

小幅冰綃當寫真前生知己是靈均月明澧浦湘靈遠我
是秋江結珮人

贈齊浣華女史

修到梅花定夙因少年佳耦更無倫五湖烟水西家約四

壁樓臺北苑春公子才名空跌宕仙家春屬愛清貧南來
第一傾心事偕隱風流兩壁人

低亞流蘇縷麝煤美人香草滿庭栽大家許坐青綾帳本
事應添玉鏡臺此地真成比肩里如君纔稱畫眉才焚香
欲拜坤靈扇爲向瑤宮合璧來

再贈浣華

吳粧矜重出簾遲眞箇鴻驚絕代姿小字慣摹萱草帖新
聲閒譜杏花詞畫中淥水吳王苑門外青山謝女祠等是
牽蘿茅屋意雲藍百幅製烏絲

浣花以烏絲牋見貽書謝

十載金臺汗漫遊玉堂天上竟迴頭雲藍珍重嬋娟意生

怕重題五鳳樓

畫簌紅暈點燕脂金粉香多浣玉螭欲仿簪花愁下筆玉
人纖手畫烏絲

綠琴詞

芳樹碧陰陰佳人字綠琴水雲憐古調花月託知音涼雨
高樓遠微波水榭深廣陵佳麗地秋夢會相尋

女郎綠琴年十九卒鄒君春田葬之冶坊之西同人
爲詩弔焉

埋香人去冷啼鴉回首城南玉女家白蝶飛花紅草長此
間便是玉鈎斜

茱萸灣日蕩歸橈揚子江頭冷暮潮從此畫橋明月夜更

無人解聽吹簫

當年我亦賦羅裙香塚青苔弔暮雲手種桃花三百樹教
人知是女郎墳

細雨薜蘿一路生春波畫舫麗人行年年寒食棠梨節弔
罷真娘便弔卿

贈秣陵女郎高玉瑩

六朝明月舊人家小住閨門夢綠華法曲定能歌玉樹仙
心祇合佩瓊花蘭因香悟春三月蓮性絲牽水一涯我向
烟江思打槳桃根小妹更天斜

女弟玉霞
年十四

雨中過某氏水榭感舊

楊柳碧依依桃花映水扉一鷗烟外立雙燕雨中飛墨漬

曾題壁香銷舊舞衣美人今不見寂寞畫船歸

揚州女郎桂貞受畫法於家曼以蘭扇見寄因題其

上

冰紈一握寫芳華夢入瀟湘水一涯此是玉臺新粉本美人香草美人花

揚子江頭送暮潮月明簾影夜吹簫畫蘭人定如蘭好回首紅樓廿四橋

吾家老曼風流甚東閣梅花興未闌想見燈前傳畫本燕支潑酒寫紅蘭

烟江魚素是相思遠寄蘇州索我詩欲翦吳淞半江水煩卿重畫兩三枝

璧月詞

璧月眞如此流光欲照人弓彎蓮瓣窄眉入髻雲新匿笑
頻迴面佯羞更斂顰南朝玉樹曲餘響遏梁塵

小憐曲

裊裊眞如畫娥娥總若仙腰肢與眉黛無處不堪憐
六尺錦襪瑜舞作相思地芳姓許人知書空作唐字

邗上贈夢蘭

嚶嚶鶯聲出畫紗星眸損鳳鬢盤鴉今年三過邗江路初
見揚州第一花

當風羅袖隔疏牕桃葉何年喚渡江貌是玉顏身玉立玉
人眞合號無雙

廿四橋頭月自明珠簾風細玉簫聲年來不作樊川夢怕
被青樓薄倖名

邗上重遇蘭貞感賦

庚申杪秋湖船餞別始識相於西泠今七年矣道
出邗江忽復相見青衫紅粉同增憔悴酒闌話舊
迴首惘然不禁昭諫當年之感矣

綠楊城郭重逢處紅葉湖山饌別時迴首七年如夢寐藕
花風裏說相思

我如昭諫詩名老君比雲英玉貌新我媿成名君待嫁人
間同是可憐人

意雲

春雲初長鬢垂鴉如玉風姿說蔣家十五芳年嬌蕊一
雙紅頰暈桃花雲容似月羞明鏡蘭氣如烟靜碧紗憶到
大羅天上事此人應是婉凌華

二月春衫杏子嬌東風消瘦女兒腰芳心不解葳蕤鎖薄
命空憐宛轉橋爲愛長顰知有恨慙因小病寫無聊背人
領取銷魂意秋水盈盈倚玉簫

過雨春苔浣畫闌補蘿茑屋夕陽殘簪花應怯雲鬟重倚
竹遙憐翠袖寒愛說家常偏有味也知荆布必相安如何
阿母偏珍重弱絮因風去住難

記取清江識面時曲房初捲畫簾遲鬪茶水碧沉雲腳中
酒春紅上雪肌翠黛有情憐綽約黃金無字鑄相思匆匆

不作湖州約恐誤重來杜牧之

雲璈

看徧吳王苑裏花娥娥誰似爾芳華飛瓊定與知前世碧
玉何嘗是小家水閣停箏金雁澀畫屏倚枕紫鸞遮稱心
祇覺無雙好好事誰爲古押衙

紫罽圍屏燭影沈闌干隔斷畫樓深金甃枕濕湘娥淚綠
綺琴傳卓女心比目白魚難得水相思紅豆易成林祇應
別有纏綿意不爲中年百感侵

未向花前鬪舞腰何曾午夜聽吹簫偶因眉語千迴顧但
覺心情百遍撩烟月淒迷空有影星辰離合轉無聊如何
一晌樓頭見鍍石肝腸爲爾銷

微步珊珊楚佩輕人間重見董雙成蓮花本自凌波出桃
葉終期打槩迎所惜鴻飛仍兩地辜他蟾影到三更彩毫
珍重題襟意願傍雲璈過一生

消息

微波消息苦難真青鳥傳書託暮雲花裏閉門依阿母燈
前繡佛憶夫君牽蘿影瘦憐蓬鬢倚竹人遙冷畫裙愁絕
雲璈歸去後粧臺涼葉墜紛紛

迴首蘇臺憶舊遊碧桃花裏小紅樓箏聲隱隱停金雁簾
影層層下玉鉤畫燭花殘遲識面杏梁日出照梳頭不堪
寂寞邊淮夜一度思量一度愁

南部新書記小名就中惆悵是傾城梅花夜月憐孤館桃

葉春星感舊盟帆影幾番河上路馬蹄殘歲雪中行爭知
辛苦關山遠一半閒情爲愛卿

匏爵姻緣夢未虛靈簫墨會定何如玉環有約心同密銀
漢無梁跡尙踈雲樹天長橫晚鴈烟江潮落問雙魚女蘿
門巷知何在愁絕佳人一紙書

感舊

曹唐解賦小遊仙重叩雲璈一惘然半臂賦中人絕代連
環約後夢經年莫因羞見增憔悴如此深情忍棄捐憐汝
昨宵珍重意月中親泛采蓮船

簾櫳小院綠陰陰訴盡嬋娟別後心燕子來時渾似舊海
棠開後到如今烟波夢怯神山遠香火緣憐佛叔深一事

思量轉惆悵有人新寄白頭吟

惆悵

別太匆匆我亦愁雙魚珍重寄綢繆細嘗蓮子知心苦採
到蘋花不自由吳苑夢殘人柳小袁江天遠女蘿秋劇憐
十索丁娘意讀到離騷憶寒修

芳心珍重謝嬋娟花片真成悟後禪翠袖憐才卿有意扁
舟載艷我無緣玉簫後約雲空合畫燭前塵月未圓到處
青樓畱薄倖此身真似杜樊川

玉壺仙館春夜聽許小瓊彈琵琶歌

春城日墮啼晚鴉金昌亭畔開桃花玉壺仙館夜置酒坐
聽玉手彈琵琶琵琶聲急知心苦四條絃上柰何許一曲

新聲萬疊愁怨煞江南小兒女家本青山古瀨陽浣紗女
伴照明璫阿嬌矜貴黃金屋盧女門楣白玉堂舊家門第
推華轂家裏鸞封十八軸落花小劫未埋香吳娘暮雨瀟
瀟曲十五琵琶始學成善才弟子盡知名三生幽怨鮫人
淚併入冰弦一兩聲飛瓊不跨秦臺鳳玉顏憔悴芳心痛
一墮紅塵祇自憐步虛時作遊仙夢紅粉漂零最可悲黃
金誰解贖蛾眉隔簾更有人如玉第一琵琶我所思

贈女郎劉雲衣

最小嬋娟說奉華粧成雲髻映朝霞此行不負琴河水臨
去猶看第一花

如此登高合賦詩樓臺平壓萬花枝紅闌干外山如黛看

到斜陽欲盡時

總持遺宅傷城隅
蒙叟風流尙有無
此是絳雲殘劫地
美人可是柳蘿蕪

驚鴻石畔說三生
箏語琴心苦未明
欲去不成畱不得
最銷魂是此時情

瞿夢香招飲吹月填詞館席上重遇女郎蘭貞

百花吹上繡衣裳
燕玉風姿勝海棠
翠鈿壓鬟香步屣
銷魂新學內家粧

牕前碧樹感年華
小妹雛鬟鬢未鴉
桃葉桃根好顏色
聰明都解說桃花

輕雷急雨滿庭秋
記泛紅橋水上舟
今日海虞山下見
柳

絲風裏說揚州

花陰涼月白紛紛一棹琴河影又分
底事匆匆便歸去女羅門巷說殷勤

小雙文香

當年曾訪舊粧樓燕去梁空日暮愁
桃葉偶然畱小影蓮花可惜過人頭
夢中胡蝶春痕短劫後鴛鴦水國秋
珍重雲璈相問訊浣紗同上木蘭舟

小雙

墜葉粧臺捲碧紗依然雲髻翠盤鴉
前塵悄恍迷香洞往事淒涼感夢華
畫舫春歸人似月玉關天遠客無家
舊時樓角分明見祇隔紅牆一樹花

文香

贈女郎李雲粧

朝雲遺事未荒唐十八宮鬟翠鈿涼樓上珠鐙天上月夜深齊照美人粧

春水桃花見一枝芳名初認李師師他年畫舫重相遇應賦琴河感舊詩

三月十二夜宴城西張氏園贈繡琴寶霞

秣陵明月廣陵花壓倒閭門萼綠華妹是桃根姊桃葉一江春水是天涯

春風吹縐小池寒垂柳絲絲露未乾明月隔林花在水玉人同泥畫闌干

當筵紈扇乞畱題鬟擁烏紗翠黛低六尺紅氍雙碧玉簫聲吹出萬花西

秦淮流水石城潮水閣垂楊繫畫橈無限銷魂酒邊事一
尊翦燭話南朝

重遇髻卿

隔簾春雨響琵琶重見闌門萼綠華當日泥人髻彈燕祗
今臨鏡鬢堆鴉旗亭曲斷銷殘夢畫舫詩成感落花春水
半塘蘭槳路城南重訪謝娘家

花雛曲

蘭氣吹香百和熏瓊花照影識靈芬尊前芳姓分明記天
半朱霞更碧雲

畫屏春膩牡丹肥彷彿春痕玉一圍舞到迴風歌到雪萬
花吹上五銖衣

蘭鐙初暗酒初中雙鬢梨渦隱斷紅雲與寫神花寫影珮
聲微夏玉玲瓏

小玉芳年更小姑芙蓉裙衩稱輕軀花雛兩字殷勤贈如
此花枝定有無

彷彿前身是麗華春雲初長鬢垂鴉一枝未放鞋紅影壓
倒吳門萬樹花

青鳥能知小謫年蘭香往事總如烟移根倘許雕闌種拚
費初明十萬錢

兩番相見問花樓一斛明珠待我酬我是當年狂杜牧肯
畱春恨在蘇州

美人壁阮

蘭房夜靜華月明芙蓉花落秋潮生十三鈿柱金雁橫非
琴非瑟非秦箏銅槽宛轉冰絃清明珠瀉作流波聲美人
花顏何娉婷修眉豐頰穠袿輕含愁含怨難爲情難爲情
復難說長相思久離別巫山高高湘水濶天上銀河割空
碧金井鴉啼玉階雪春華遲暮秋芳歇曲中聲斷羅衣濕
離離北斗夜向闌迴身歛袂玉指寒錦囊收拾銀甲卸同
心未遇休輕彈

女郎薛小濤乞詩口占二絕

垂髫年紀十三餘花貌盈盈玉不如雲鬢未梳眉未畫花
時真合閉門居

紅闌橋畔綠陰斜門外閒嘶白鼻騮好種枇杷花一樹教

人知是薛濤家

小濤居紅關子橋

吾園綠波池上贈南陵女郎盛文卿並紀本事

珮聲微戛玉玲瓏
紈扇輕涼弄晚風
閒向綠波池上坐
一奩春水照驚鴻

浮名湖海感尊前
翠袖瓊枝拂綺筵
玉釧一雙教鎮紙
幾生修到浣花牋

再贈文卿

月中花影步瓊瑤
絳螭尊前鞞細腰
玉樣溫存花樣瘦
一回相見一魂銷

吾園見後空園見
如此嬋娟得未曾
數徧吳宮花萬樹
江南春色在蘭陵

新廂候潮畱別文卿

停橈正待晚潮生珍重嬋娟遠送行仙貌當花原綽約眼
波如月最聰明千家綠雨江頭樹一角紅霞海上城欲去
不成畱不得更無人解此時情

幾番深意託寒暄更與殷勤勸一尊得再相逢應慧業較
初識面倍溫存墨消翠袖新題句香澹青衫舊酒痕我是
當年白司馬琵琶重與譜銷魂

撞撞心事問誰傳絮語臨別各黯然花月閒情陶靖節江
湖春恨杜樊川停雲蹤跡聞箏後團雪因緣罷酒前春水
連天愁萬種相思都付木蘭船

晚潮欲上暮雲收新月如眉隱舵樓送遠情如山岳重臨

歧語更水波柔淚拋珠幌難爲別目斷香車始欲愁恨不
烟波師範蠡從君竟泛五湖舟

不得文卿消息

鳳泊鸞飄竟杳然海天往事總如烟候潮新牖畱佳約載
酒吾園託後緣吳苑秋風前夕去雲間明月幾時圓桃根
桃葉浮萍似不載鴛鴦兩度船

蘭舟有懷文卿

最憶楊林餞洛神蘭橈風細水生鱗畫船仍傍秋江泊不
見凌波拾翠人

獨遊吾園遇女郎斌卿詢得文卿消息賦贈三首

林塘水木更清幽整息塵蹤此獨遊花石有情曾對酒湖

山無恙又登樓紅闌最憶攜琴坐碧水依然抱檻流林鶴
迎人似相識數聲清唳入高秋

隔離金犢未迴車意外相逢萼綠華翠袖涼新頻倚竹綠
鬟雲鞞偶簪花亭亭玉貌如新月嫋嫋閒情入斷霞選石
清譚話塵世不須惆悵鈿琵琶

問到雲翹百感生觀香小妹舊知名楊枝未有香山約桃
葉曾偕畫舫行滄海烟波人萬里吳門花月夢三更秦娘
橋畔重相訪期與殷勤話玉京

山塘觀水嬉

畫樓高下畫船齊簾影如雲壓水低香氣一隄花市北笛
聲雙槳冶坊西綺羅士女羣芳譜金碧湖山畫畫溪如此

佳遊良不惡酒邊潑墨寫無題

出色明粧稱玉顏紅酣翠鞵總蕭閒一雙花掩驚鸞袖十
八雲低墮馬鬣釵影暗搖珠絡索珮聲微動玉連環畫闌
干畔齊迴首看取凌波奪錦還

七里塘邊轉畫橈青山岸幘寄無聊浦遲筇遂催新月滙
泛臙肢落暮潮薄醉酒痕憐態勸下風花氣最魂銷分明
一片相思地半是金樽半玉簫

衆中第一最華妍第四橋邊第五船照水驚鴻窺絕世橫
釵么鳳識芳年三生花月春前夢半榻茶烟悟後禪不作
碧瀾堂畔約閒情深悔杜樊川

山塘晚歸留別素芬

詞譜卷之九
三
緩緩歸橈動遠愁。袂衣吹動白紵秋。蘆聲幾處隄邊舫。簾影誰家水上樓。小雨香隨花氣遠。微波涼帶月華流。美人送別橫塘路。又作銷魂一度遊。

贈女郎素婷

楊樹灣西第幾家。小紅樓角曉啼鴉。簾前嬌臥金鈴犬。門外閒嘶白鼻騮。蘆裏新聲翻玉樹。鏡中麗色奪瓊花。年來慣作遊仙夢。又見閨門萼綠華。

水嬉時節百花殘。兩度橫塘見采鸞。左顧螭螭明似玉。微聞薌澤靜如蘭。眼波真箇明堪照。眉黛還疑秀可餐。最是隔簾看奪錦。笑聲先近畫闌干。

綠漲吳城四百橋。桃花春岸藕花潮。情深思作爭人捧。綠

淺難爲邃步邀微雨輕寒曾昨夜曉風殘月又今宵吳孃
水閣春如海第一關心是玉簫

隨風珠玉口脂香解話相思可坐忘無賴偶然依假母有
情纔合號眞孃紅樓天近人偏遠碧波深恨更長願作
盧家雙燕子飛來得勿鬱金堂

重訪素婷已逝月餘惆悵之餘作四詩以哀之

年來惓悵悔閒情話到蘼蕪百感生記取雲容開一顧果
然仙貌似雙成紅蘭泥露停瑤瑟自柰簪花冷玉笙一樣
簾櫳下銀蒜聽來都是可憐聲

酒旗歌板送年華舊夢迷離說館娃問渡偶過桃夏里停
雲曾訪杜秋家紅憐南國相思樹白愛西天稱意花一夜

風吹太急蕭蕭落葉付啼鴉

水盼蘭情絕妙詞堯嬈心事碧雲知香殘鈿閣春歸早燈
暗蘭舟雨到遲香塚何年生紫玉橫塘有客弔西施水嬉
賦罷烟波冷惆悵樊川鬢有絲

東風細雨百花洲重訪吳嬈水上樓鳳去臺空明月冷鴈
回人遠暮雲秋曾邀紅粉畱香屨擬築青山塋玉鈎墨會
香琴歌琴絲盡零落爲伊併作十分愁

能紅閣本事詩爲高犀泉作

消息傳來總惘然前身知是杜樊川何郎官閣頻相問蘇
小鄉親倍可憐廿四橋頭花似雪十三樓外月如烟美人
祇合揚州住畫舫春波照翠鈿

湘簾小閣署能紅人面桃花怯曉風
贈芍預愁經歲別種蘭難得兩人同
身無彩鳳雙飛翼心有靈犀一點通
嗟到玉溪佳識在西崑詩體本來工

吾家老曼風流甚都講才名麗若斯
金葉畱香研石黛紅蘭淚酒寫燕支
玉簫漸緩挑鐙夜羅帕親繡倦繡時
兩種深情消不得閒來愛讀碧城詩

綠楊城郭夢啼鴉何處紅樓謝女家
第一自應憐玉貌無雙眞合號瓊花
澹雲夢淺停瑤瑟素月春寒瘦碧紗
惆悵匆匆廣陵過不曾親見婉凌華

過能紅閣訪月香女史蒙寫湘花小幀見貽並弔墨

香

梧桐金井晚啼鴉嘶過城南白鼻騮一樹瓊花仙女影二
分明月玉人家前塵油壁尋蘇小歸夢吳宮問館娃記取
相逢卽相別匆匆譚往譜琵琶

多少才人謝愛卿果然秋水玉壺清蓮花有意凌波出桃
葉無勞打槳迎碧玉小家偏鄮重綠珠心跡自分明知音
我是崔懷寶願作瓊瓊膝上箏

素心惟有月明知爲折湘花寫一枝腕弱不禁磨墨後態
閒想見畫眉時有人魚素稱都講謂曼知爾離騷是本師欲
仿梅邨畫蘭曲媿無才筆寫烏絲

能紅閣是鬱金堂當日名花領衆芳白璧有人偏按劍青
山無地可埋香琴河水落停雲遠箏院春歸夢雨涼悵我

緣慳卻多恨碧城何處護鴛鴦

又題畫蘭一絕卽用原韻

爲花原當寫相思不是知音未許知一幅瀟湘秋夢影賞
心原祇兩三枝

爲碧城主人畫蘭並題一絕

月香桂貞

湘草湘花我所思素心惟有月明知玉臺久已拋殘墨
重爲騷人寫一枝

偕雙南步月至小窰翠羽樓賦贈四律

魚家橋北畫塘東隔斷紅塵有路通箏笛簾櫳秋影裏闌
干門巷月明中移家金谷新居近罷酒蓉城舊夢空炮盡
燭花譚往事碧天如水送征鴻

已恨遲生杜牧之。今生識面未嫌遲。綠珠憔悴人偏好。碧玉風流我所思。水閣秋聲翻笛譜。粧臺春雨潤琴絲。櫻桃湖上梨花月。曾向紅樓照畫眉。

誰向銅鋪鎖阿甄。黃初遺事可憐春。椒塗蘅薄流芳地。翠羽明珠絕世人。自有輕鞋好衣飾。果然約素瘦腰身。多情媿乏陳王筆。又眇芝田賦洛神。

灼若芙蕖出淥波。渺然羅襪帳如何。可容墨會兼琴會。應有長歌續短歌。湘管一牀浮暖翠。紅絲小硯拂香螺。十三行字爲卿寫。迴雪驚鴻喚奈何。

月夜過翠羽樓聽丁小宓彈琴用梅村集中聽女道

士下玉京彈琴歌韻

咽咽雌風語切切孤鸞鳴冰絃纏玉指一一皆秋聲美人
渺含愁翩然乘風下玉京幾次尋春不相遇泰娘門巷吳
城路聞聲早已十年前一角櫻桃湖畔住玉顏絕代矜無
雙江南明月垂華瑤明月在天秋在水娟娟柳外嬌鵲黃
畫壁塵生古綠綺等閒未肯彈清商黃絕嬾學慵來粧琵琶
笑謝崑崙康自憐舊是花中王年來桃葉頻呼渡六張
五角多枝梧十里珠簾問玉簫翠黛花黃不知數魚家香
雪杜家蘭韶顏不惜千迴顧祇有明粧與世憐情無絕業
勞人妬弱柳牽絲鳳髻拋飛花墮席娥眉悞秦女吹簫未
有臺桓生邀遂曾無步昨日城南走玉驄當門秋水照夫
容幸教身到層樓上未許名題畫舫中稚齒侍兒工摘阮

綠鸚聞誦唐詩選匏爵靈簫故事微蘭音翠羽閒愁遣十
索新詞誦幾篇匣中畱得舊花鈿尊前細訴嬋媛意花絮
飄零又幾年春風不種相思子肯惜鴛鴦抱香死女蘿慙
悴冷秋花怨草衰蘭竟如此爲我花前理素琴遲遲玉軫
寫芳心恰將洛浦驚鴻怨寫入平沙落雁吟元菟城頭吹
簫築皂雕夜撲低飛急一繩和月度蕭關健兒辛苦征人
泣蘆花楓葉暮江邊我亦頻年繫畫船聽到餘音感秋夢
詩中小字憶嬋娟仙心嫋嫋山香舞停琴更爲更番鼓梅
花三弄落空山江城橫笛同淒苦是日鼓平沙落雁
梅花三弄二曲才人
失意感青衫美人夫路歸黃土香塚淒涼更幾人零脂脰
粉從頭數坐客聞聲起歎嗟聲聲哀怨似悲笳最憐漢殿

無雙手原是吳宮第一花

重遇琴芳有懷清江舊遊

淮陰記訪六萌車
姜氏橋西第幾家
門外兩株烏臼樹
庭前一樹馬櫻花
玉容病瘦春無主
羅幙宵分月正華
今日恰從吳苑見
爲伊重賦鈿琵琶

金昌亭畔畫橋頭
水閣瀟瀟落葉秋
自愛芳名呼綠綺
人憐花影隔紅樓
銀箏心事浮雲散
錦瑟年華逝水流
重向鬱金堂畔過
蘭因絮果不勝愁

此間舊是玉人居
史鳳娉婷世不如
所居爲文
香舊地聽雨記曾

華燭翦綰雲親見
碧鬟梳盃珠西曲
人何在宋玉東牆願

竟虛聞道莫釐峰
下住近遊居
洞庭玉湖烟水隔芙蓉

人生原是可憐蟲往事匆匆証雪鴻燕寢餘香秋夢短龍
華小劫夜雲空黃河水濶魚書杳青海天遙雁路通迴首
袁江同話舊夕陽西下暮潮東

題吳門畫舫錄贈董竺雲

鑑湖才子西溪客騷壇旗鼓推詩伯十年流浪老江湖倚
醉狂歌拓金戟年來賃廡伯通橋門外垂楊繫畫橈惆悵
中年還聽雨吳娘水閣暮瀟瀟瀟瀟暮雨愁人意水烟漠
漠紅牕閉三五佳期二八年畫樓多少銷魂地芳草城南
路狹斜窻嬾隄近泰娘家慣停短簿祠前棹徧看長洲苑
裏花長洲苑裏花如許娥媼都似吳宮女春風處處長鶯
花夜月家家照歌舞新從花國譜羣芳翦盡秋鐙壁月涼

衆裏嬋娟誰第一琵琶一曲杜韋娘烏絲幅幅鴛鴦字親
與紅闌傳軼事卅首江淹艷體詩一編張泌粧樓記烟柳
絲絲綠未齊相逢最憶板橋西樽前各領纏綿意一卷書
成屬我題嗟我囊琴意可哀頻年落拓客燕臺青衫憔悴
無人問祇有蛾眉肯愛才十丈緇塵浣素衣今年纔自鳳
城歸斜陽水郭孤舟泊正及盧家燕子飛綠楊門巷春如
畫盧家燕子畱人話多少花明玉艷人青綾欲下紅粧拜
潭水桃花碧浪遲蘭香窈窕謫仙姿雪中鴻爪風前絮惆
悵新添本事詩絕代娉婷憐史鳳碧城曾賦遊仙夢重來
祇有閉門羹不教闌入迷香洞文就中心識董雙成低按
雲和最有情親解玉環畱一顧願從鴛牒定三生四百橋

邊波似鏡十三樓上明粧靚別有雙鬟姿首佳花前都與
芳名贈曉風殘月柳屯田送別旗亭意惘然迴首素春高
閣上江南花月總如烟展君小錄心根觸夢華軼事從頭
讀紫釵尙恐有遺珠後編畱與他年續豪竹哀絲喚柰何
就中詞賦更誰多青樓不作樊川夢惆悵華年此度過烟
花千古山塘路美人黃土眞娘墓黃鵠重來事有無離心
愁煞蘇臺樹吳宮花草最相思開寶繁華又一時但學魏
收作佳傳休教宋玉有微詞

題女郎吳春蘅梅花小影春蘅適自廣陵避人旋吳
故篇中及之

芳姿鄭重說揚州楚楚眉痕寄遠愁寂處也聞花氣息坐

來惟覺玉溫柔舊家茂苑青山好往事邗江碧水流今夕
春鐙照冰雪相逢記取洞簫樓

桃葉烟波怯渡江美人心事木蘭艣可無春怨貽蘭佩定
有閒愁對玉缸碧樹何勞期下九瓊花原自號無雙絳仙
眉黛嬌如許自寫長蛾倚綠窗

淺水幽林好畫圖滿身踈影暗香扶此生修到梅花好相
對應憐夜月孤短夢偶然迷翠羽芳名聞道喚靡蕪玉簫
休作江城弄恐有天風颺五銖

我亦人間有半生題襟墨澹尙分明種花偶學林和靖作
賦曾師宋廣平今日眞從吳苑見當年虛作廣陵行鬢絲
禪榻樊川夢一縷茶烟共晚晴

周通室詩外集卷八
聽話崇明女子夏眉丰事

遠道蛾眉嫁餘生虎口還魚龍鏡翠黛劍戟俠花鬢戍壘
軍鋒盛樓船將略嫺翠翹前事在浪擲惜紅顏

贈杜蕊蘭

第一嬋娟子無雙娥媚娘湘人吟杜若仙子字蘭香碧櫛
高城遠紅闌小院長舊家何處是遙指碧城坊